

ունենալ. եթէ էւօլիւցիան հող չէ պատրաստել, այդպիսի երևոյթները պատմութեան մէջ միայն արկածի բնոյթ ունեն, և Ագրքէջանը դիմեց արկածախնդրութեան:

Իւրաքանչիւր մարդ, որ ծանօթ է հասարակական կեանքի պատմութեան, պէտք է լաւ դիտենայ, որ Ագրքէջանում կատարւում է մի կեղծիք, և այսօր Հայաստանի խորհրդարանի պարտքը պիտի լինի պատուել դիմակն ու մերկացնել այդ կեղծիքը:

Պատգամաւորներ, իր կոմունիստական կեանքի երեք օրը դեռ չսպարած՝ Ագրքէջանը անում է առաջին քայլը. պէտք էր սպասել, որ նա հանդէս կը գայ նոր նշանաբաններով, որ նա բոլոր միջոցներով կը ձգտի վերջ տալու արիւնհեղութիւններին, սահայն, դրանց փոխարէն, վերջնադիր է ուղարկում Հայաստանին և կամենում է Ղարաբաղի ու Զանգեզուրի բմբոս ժողովրդին իր ձեռքը ձգել, խանական տիրապետութեան մէջ կեղեքելու և ճնշելու: Այս փաստն ինքնին մի փառաւոր ապացոյց է, որ Ագրքէջանի նոր կառավարութիւնը երբեք կոմունիստական չէ, նա հին կառավարութեան հարազատ դաւակն է ու նրա նպատակների մոլի հետապնդողը:

Ագրքէջանի վերջնագրին մենք ունենք միայն մէկ պատասխան — Ղարաբաղը և Զանգեզուրը, ունենալով հոծ հայութիւն, պէտք է միանան Հայաստանին (ազմկալից ու երկարատև ծափահարութիւն): Հայաստանի կառավարութիւնը պէտք է ձեռք առնի բոլոր միջոցները, պահպանելու Հայաստանի անբաժան մասը կազմող Ղարաբաղն ու Զանգեզուրը (բաւոն ծափեր):

Մենք ստացել ենք նաև երկրորդ վերջնադիրը, այս անգամ արդէն Խորհրդային Ռուսաստանի ներկայացուցիչների կողմից: Նախ, կարևոր եմ համարում մատնանշել, որ Հայաստանի վիճակը խորհրդային կենտրոններում չէ պարզաբանւած ճշտօրէն և իմ խորին համոզմամբ այս վերջնադիրը արդիւնք է Ագրքէջանի կեղծ ինֆօրմացիայի: Ամենից առաջ կառավարութեան պարտքն է կանոնաւորել ինֆօրմացիան:

Միև կողմից, մենք չենք կարող անտեսել, որ հայ ժողովուրդը կուլտուրական կապերով կապւած է Ռուսաստանի հետ. այդ այդպէս լինելով հանդերձ, չենք կարող նոյնպէս չլիշել, որ Ռուսաստանից ընդունած կուլտուրայի վրա հայ ժողովուրդը միշտ դրել է իր հանձարի, իր ստեղծագործութեան ուրոյն դրոշմը, որ ապացոյց է նրա կենսունակութեան ու սեփական կորովի:

Յարգելով կուլտուրական կապը, մենք պարզ և որոշ պէտք է յայտարարենք սովետական Ռուսաստանին, որ հայ ժողովուրդը ազատ պիտի լինի, որ նրա ինքնորոշելու իրաւունքը անվիճելի է հէնց իր հոշակաւոր նշանաբանի համաձայն: Ես համոզւած եմ, Խորհրդային Ռուսաստանը այդ իրաւունքը խախտել չի կարող: Կոմունիստների Մոսկւայի համագումարը ի լուր աշխարհի յայտարարել է, որ խորհրդային իշխանութիւնը պէտք է ազատազրէ բոլոր ճնշւածներին ու նրանց ազատ զարգացման հնարաւորութիւն պիտի տայ: Յատկապէս հայ դատի նկատմամբ այդ նոյն խորհրդային իշխանութիւնը թէ յատուկ դեկրետով և թէ խորհուրդների երրորդ համագումարում որոշակի դրական վերաբերմունք ունի ցուցադրած. թէ այդ դեկրետով և թէ համազումարի որոշմամբ նա ճանաչել և ընդունել է անկախ Հայաստանի գոյութիւնը: Հայ ժողովրդի համար այժմ հասել է ժամը ազատութեան, և խորհրդային իշխանութիւնը պէտք է կատարէ իր խօսքը՝ ճանաչելով ու ամբապնդելով մեր ազատութիւնը: